



OPINION PUBLICO

Necesidad pa reglanan cla:

Maneha asuntonan transgender den espacionan publico

ESTIMADO AWEMainta,

Mi ta skirbiendo pa expresa mi preocupacionnan tocante un incidente cu a tuma luga recientemente na un hotel prominente na Aruba y pa enfatisa e necesidad urgente pa maneho pa atende inclusion transgender den espacionan publico.

E situacion a sosode den un establecimiento unda un persona masculino (den transicion pa femenino) a uza e baño di hende muhe. N'e momento ey, e individuo tabata biologicamente masculino, loke a haci varios hende muhe den e baño incomodo.

E incomodidad a conduci dos huesped femenino pa pidi un 'maid' pa yama siguridad. Ora e guardia di siguridad a yega, el a pidi e individuo transgender cortesmente pa bandona e baño. Desafortunadamente, esaki a escala e situacion. E individuo a acusa e hende muhenan, e 'maid' y e guardia di siguridad di discriminacion y a cuminsa insulta tur hende involvi.

Mientras e discusion a atrae mas atencion, un manager Mericano di e establecimiento a pidi disculpa n'e individuo transgender y a reprende e dos hende muhenan, como tambe e 'maid' y e guardia di siguridad. Sorprendentemente, e manager a hasta menasa di kita e 'maid' y e guardia di siguridad for di trabou pa nan accionnan.

E reaccion aki a disgusta varios testigo, cu a sostene e hende muhenan y e personal, argumentando cu nan no lo sinti comodo si nan yiunan muhe mester comparti un baño cu un persona biologicamente masculino. E incidente aki ta destaca un problema creciente na Aruba.

Mientras nos isla ta conoci pa su hospitalidad y inclusion, e ta tambe profundamente ancra den balornan conservativo y religioso. Balansando e balornan aki cu e derechonan di individuonan transgender ta rekeri pensamiento cuidadoso y guia cla pa evita tipo di conflictonan asina den futuro.



Ta tempo pa gobierno y sociedad tin un discusion habri tocante con pa atende situacionnan manera esaki. Manehonan por inclui e creacion di bañonan 'gender-neutral' pa proporciona un opcion sigur y inclusivo pa tur hende. Establecimentonan tambe mester ricibi training riba con pa maneha e scenarionan aki respetuosamente y profesionalmente. E medidanan aki lo yuda proteha e derechonan y dignidad di tur individuo mientras ta segura e comodidad di publico en general.

E incidente aki ta un yamada di atencion. Como cu e tipo di situacionnan aki probablemente lo sosode cu mas frecuencia, nos mester actua awor pa preveni mal comprendemento y conflicto. Door di traha hunto pa crea manehonan cla, Aruba por sigui ta un destinacion acogedor y inclusivo mientras ta respeta e balor y preocupacionnan di su residentenan.

Atentamente, un lector. (nomber y fam conoci pa redaccion)
"E articulo aki a wordo reskirbi pa wordo publica."